



TAPAK 10

Rohit coaching academy ka indang brand ambassador kumogo



TAPAK 8

South Korea tir Moon'er teloki takok angur

VOL. XVII NO. 169 (ADOK 169) DIMAPUR

ROGONÜ (FRIDAY) RONGCHII (APRIL) 17, 2020

₹ 5.00

India sorkar aser NSCN/K-Khango nati ceasefire atsulang

Kohima, April 18 (TYO): Tang alima nung Covid-19 tashidak wara aliba tensa nung ajemdaker, India sorkar aser National Socialist Council of Nagaland/K-Khango, Nagaland nati 2019 kum April 15 nu New Delhi nung nung melungtepa sign asuba yearly Ceasefire agreement April 14, 2020 nung tembangtsu lia telok anapronglai ano ita trok ceasefire atsulanga Kohima nung sign süogo, ta Brihostibarnü Office of the Chairman, Cease Fire Supervisory Board, Ministry of Home Affairs

GoI sangdong ajanga metetdaksü.

Naga nungeri shilem agia Nagaland nung teti atema yimjung alitsü asoshi India sorkar aser National Socialist Council of

Nagaland/K-Khango, Nagaland napronglai melungtepa April 16, 2020 nungi tenzuka ita trok tashi, October 17, 2020 tashi Ceasefire Agreement atsulangtsü lemtego, ta kasa sangdong nung shia lir.

Ceasefire mapang nung telok anapronglai lateta sign asuba ceasefire ground rules benshitsu aser Ceasefire ground rules ji telok anapronglai reprangshitsu aser yanglushitsu.

Ajioda telok anapronglai April 16, 2020 anogo nung ceasefire agreement agia Shellen Konyak, Supervisor CFSB NSCN(K) Khango, Kaino Chishi, Secretary CFSB NSCN(K) Khango aser Lt Geb Shokin Chauhan, Chairman CFSB Ministry of Home Affairs Government of India nungeri sign süogo.

DC Dimapur-i aibelenertem merenshitsu

Dimapur, Rongchii/April 16 (TYO): Deputy Commissioner, Dimapur ajanga aiben totuyuba agujaka yimtsung kar nung medical ketdangser, COVID-19 atema emergency duty nung alir aser Zion Hospital Dimapur nung inyaker aser shirangertem senzutsü nokdangba osang angazukogo.

Anungji iba ama mapa inyakerterem Disaster Management Act 2005 temzüng

asur IPC indang Section 188 kubok aliba ozungtem agi alentsü, ta Deputy Commissioner, Dimapur ajanga sangdong ka nung metetdaksü.

COVID-19 prokshiba azuoktsü asoshi samanir sür inyaker tushia aser akhum aguja amshitsu asoshi yimtsung putu menden/colony chairman aser nübunur ajak nem DC Dimapur ajanga totuyuba agütsür, ta sangdong ajangasa ashi.

COVID-19 agi shirangertem anepalutsü NHAK renema lir : Dr Aonok

Kohima, Rongchii/April 16 (TYO): Naga Hospital Authority Kohima (NHAK), koba state yimtiba nung COVID-19 mozüki asutsü mejeta shimteta lir, iba mozüki nung coronavirus tashidak agi shirangertem anepalutsü asoshi renema lir, ta mozüki Public Information Officer (PIO) Dr Sentimeren Aonok-i ashi.

Mozüki kima osangbenertem den sensaksema mapang Dr Aonok-i, COVID-19 agi shirangertem anepalutsü asoshi mozüki nung yipden 67 renema lir aser nungdang dang süra shiranger timba anioka anepalutsü asoshi lenmang sadema lapoka lir, ta ashi.

Paisa, shirangertem anepalutsü atema doctor 40, nurse 137 aser tanga staff 300 dak tema desema health workers

500 shi atema mozüki ketdangsertemi roster renema lir, ta ashi

Tang ICU nung yipden 20 lir aser idakji ventilator teku lir, ta pai ashi. Paisa, yimti tezulen aliba Chedema COVID-19 hospital nunga yipden 40 renema lir ta ashi.

Health worker tem atema Personal Protective Equipment (PPEs) quality balala aliba indang jembidang pai ashiba agi, sorkari Health and Family Welfare Department ajanga PPE 2055, N95 mask 1100, FFPA mask 2600, triple layer mask 12,300, Infrared Thermometer 10 aser High Viral Transport Medium 10 agütsüogo. Maneni mozüki nung hand sanitizers, sterile aser non-sterile gloves peria lir, ta paisa metetdaksü.

(Maneni tapak 2 nung...)

BSL lab atema osettem Dimapur tonga aruogo



IAF aser State sorkar ketdangsertem Dimapur Airport nung April 16 nu BSL oset tonga aruba sülen tangokba noksa nung angur.

Dimapur, Rongchii/April 16 (TYO): BSL lab amenoktsü atema osettem IAF C -17 globemaster tayimtsü nung Dimapur tonga aruogo. Nagaland Angh RN Ravi aser India Defence Minister Rajnath Singh nati teyari aguja, NHAK, Kohima nung BSL -3 amenoktsü asoshi kanga nungdaka aliba sophisticated equipment tem densema oset ton 18 Mumbai nungi bener aruogo.

Oset den külemi iba lab amenoktsü asoshi technical team ka dena aruogo. Tayimtsü koba April 15 nu tonga arutsü liasü iba tayimtsü ya Assam nung tsüngsang majungba ajanga marutet. Naga nungertem atema iba lab kanga nungdaka angateta IAF-i diplomatic channel balala ajanga Bangladesh Air space amshitsu merangdang, saka yipur anüdokleni nonger aoba ajanga

tayimtsü athitsüsa akum aser April 16 nu tonga aru. Dimapur nung BSL lab amenoktsü asoshi osettem yakta tonga arutsü imlar, koba IAF tayimtsüsa bener arutsütsü.

Nagaland Chief Ministers indang twitter aser office ajanga, Nagaland nung lab amenoktsü asoshi temelaba agitsü nungdaka alibatem mapang shidak nung melaba atema pai ICMR N Delhi nem tenüngsang agütsüba den Naga nungertem dang iba lab ya takaratiba nung inyaksangshi tenzüksü asoshi tanen makai inyaksü ta tenangzüksü agütsü. Linük ajunga mokdang aliba ajanga inyaksangshi mesademi kümer liaka state sorkari state aser nübunurtemi nungdaka osettem peritsütsü merangdar aser department ketdangsertem aser agency balalai bendanga aguja inyakba tenüng asangtsü

langa lir. Iba amala mapang ka nung kati ka dak temulung lemtepa longjemer inyakba ajanga iba wara koktettsü, ta paisa ashi.

Tenemtekong, infrastructure aser tesendaktep tsütsü Naga nungertemi timtem ajangshiba ken o iaka liaka covid 19 den raratsü asoshi IAF, MoD aser GoI-i maneni bendanga aguja yaritsü merangba aser mapa ajak nung nongitba den teka amteper inyakba atema state sorkari tenüngsang agütsü.

Anogo 15 tsüngda IAF pur trokben tashi aruogo. Parnoki America nungertem tayimtsü C-17 globemaster, C130 J Super Hercules aser Russian indang tayimtsü IL 76 MD special tactical military transport Aircraft amshia Naga nungertem temi nungdaka aliba oset tone 40 jungnüa bener arutsüogo.

Nübunurtem aliba & mapa inyakba tesemtem nung face mask amshitsu

Dimapur, Rongchii/April 16 (TYO): Principal Secretary, Home, Abhijit Sinha IAS ajanga April 16, 2020 nu sangdong ka ajanga ashiba agi, NHAK Kohima nung BSL-3 Testing Lab amenoktsü asoshi hadir aser osettsüset mezüng batch tanü tongogo, koba Indian Air Force indang tayimtsü agi Dimapur tongtsü. CISHR, Dimapur nung test lap amenoktsü asoshi maparen tenzükgogo.

Dimapur nung alir ka dak Guwahati nung COVID-19 tashidak putetba dak sendakba nung, iba nisungba dak sentaktepa alir

nisungtem indang sample 140 (tayimtsü nung külemi amener, healthcare worker asr kinungertem) tendangtsü asoshi bener yoka liasü. April 16, 2020 nungdang 6:00 ako tashinung item rongnungi sample 100 aruba nung iba tashidak meputet aser tanungba sample 10 result anu maru lir.

Tang tashinung state nungi coronavirus tendangtsü asoshi tanü sample 41 yokba densema sample 226 yoka lir. Item rongnung sample 184 indang result aruba nung tahidak kata meputet, sample ana tanaben

tendangshitsu atema yokshitsu aser sample 40 indang osang ano maru, ta Principal Secretary, Home ajanga ashi.

Tang nungi tenzüka COVID-19 prokshiba nungi nokdangtsü asoshi state nung mera tasen kar bendenlokogo. Item rongnung nübunurtem aliba aser mapa inyakba tesemtem nung nübunur ajaki face mask amshitsu mesüra tejak nembangtsüla aser nübunurtemi amshiba tesemtem nung metzü memetsütsüla. Iba yimya nübunur ajaki amshitsu ajungshir, ta kasa sangdong ajangasa ashi.

Ao Sendeni arrtsü nung aliba yimtem sema ao



Anaki C nungi Ladigarth leni aluba lenmang nung Anaki C yimteni tangar marudaktsütsü asoshi lenmang lendi atsübanganga yur mitba noksa nung angur. Iba amai yimtsung shia Covid19 tashidak wara nokdangba mapa inyakdagi. (April 14, 2020)

Mkg. April 16 (TYO) : Tanü tamajung Covid19 tashidak alima ajaklen ayimsünga aoba wara nokdangtsü atema renema

mapatem reprangdanga ajungshiteptsü asoshi, yashi Mongolbar nü Ao Senden lenirtemi Assam den arrtsüsa aliba yimtem Anaki C, Anaki yimsen, Kangtsung yimsen, Wameken yimsen, Tzüdikong aser Yajang C yimtem den ano Watiyongpang Nagaland gate tashi luagi sema jajaogo aser iba mapang yimtsung shia mitkartem shimteta amang sangwa methitemi bendanglen nungi tangar marudaktsütsüsa mita ataba mapatem temulung chia reprangogo ta Ao Senden lenirtemi metetdaksüogo.

(Maneni tapak 2 nung...)

CORONAVIRUS WARASENOK LONGJEMER AKOKTSÜ ASOSHI -
Kechalenia Moi Kidang Mongang; Tangar Anasai Tou;
Teni Tebang Sü agi Nembangang; Temang Tashi Itita Yuang;
Kidang Asentzü Sendoka Exercise Agiang aser Sarasademang.



Dimapur, Rongchii/April 16: Regional Manager SBI, RBO, Dimapur Region, Paogin Haokip-i Dimapur nung COVID-19 tashidak den raraba mapang amshitsü asoshi sen lakh 1.5 indang cheque ka DC Dimapur, Anoop Kinchi IAS nem April 16, 2020 nü pa indang chamber nung amoktsüba noksa ka yangi angur.

Kohima DDMA ajanga nisung 14,000 nem teyari agütsü

Kohima, Rongchii/April 16 (TYO): Kohima District Administration aser District Disaster Management Authority (DDMA) ajanga tang tashinung Kohima yimtiba nung anempongba ajanga timtem balala ajurur alir nisung 14,000 yariogo, ta sangdong ka ajanga metetdaksü.

Osangbener den jembiba mapang ADC Kohima, Lithrongla Tongpi Rutsa-i ashiba agi, administration aser DDMA ajanga anogoshi aayanger, nungdakbapur, moteti aliba senzusemponger aser kaketshir tejangja nem yimti shibanger aliba mapang jang, dal, metsü aser alo agütsü.

"Onoki colony aser ward panchayat tem ajanga teyari agütsü, ajiasünung ang teyari agütsüba mapang social distancing yimya shidak amshiteter. Saka colony mesüra ward temi mayimjemba nüburtemi pei pei

aliba colony nung lenirtem nungi kulikaket meshia bener Local Ground-i arua teyari meshitetsü," ta laisa ashi.

Kaketshir aser lokti tentet balala nungi nungloksüba ama teyari kar agütsü, ta laisa ashi.

Lai ashiba agi, kibong ka nung nisung külemi aliba nung ajemdaker anempongba mapang nungdakba jang-o-tzü ya agütsü.

Timtem nung alirtemi gas cylinder maliteter ta osang angazüka DDMA ajanga tanü nungi tenzüka parnok nem kerosene agütsüta lemtet, ta laisa ashi.

ADC Tongpi-isa ashiba agi, administration aser DDMA ajanga yimti toktsür moteti alir aser kaketshirtem atema Local Ground nung relief camp tenzükogo. Tang iba camp nung electrocution agi timtema alir tetsürchanu ka dena nisung pezü lir.

Mezüngbo relief camp ya IG Stadium nung amenoktsü

lemtet, saka tangtashibo relief camp nung alitsü arur nisung aika maliba ajanga Local Ground ya amshir. Saka nungdakba mapang amshitsü asoshi tesem aika jangjateta lir, ta laisa ashi.

Tang relief camp nung kibong ka nungi nisung pezü aliba ya Kiphire nungi lir, saka parnok ya temang anepalutsü asoshi January ita nungi Dimapur nung liasü aser Naga Hospital Authority Kohima (NHAK)-i belen. NHAK ya COVID-19 hospital kümdaktsüba sülen parnok ya Oking Hospital-i oa yangji treatment tembanga agi.

Mozüki nungi aluba sülen anempongba ajanga parnok Kiphire-i moteti aküm aser Kohima nung kinungertem liaka colony temi ainer aser talisa mozüki nungi nisung shinga arua alitsü memelaba ajanga parok ya relief camp nung alitsüsa aküm, ta ADC-i ashi.

COVID-19 agi shirangertem...

(TAPAK 1 NUNGI...)

COVID-19 wards renema ayuba den tashidak prokshia meyoktsü asoshi aser shirangertem mozüki toktsür meyoktsü atema mozüki ajunga kanga junga mokdanga lir, ta pai ashi.

Sensaksema mapang Dr G Thong-a densema liasü aser pai power-point presentation ka ajanga ashiba agi, COVID-19 agi shiranger mezüngbuba NHAK-i aitba sülen medical staff tem indang roster duty tenzüktsü.

Paisa, health workers tem tajemba agi anogo tenet atonga inyaksü aser iba mapang tembanga sülen parnok ajak kanga junga disinfect sürang mozüki toktsür aotsü asoshi melatsü. Mozüki nungi parnok

quarantine centre-i anogo 14 atema anir aotsü aser iba sülen ano anogo 14 kidang quarantine asütsü; iba sülen ang parnok lokti nung shilem agitetsü, ta pai ashi.

COVID-19 tashidak agi shiranger asütsü ta temulung melemba bilemba nisungtem anepaluba mapang mozüki nung health worker temi H1N1 2007 PPEs amshiba dak sendakba nung Dr Aonok-i ken o jangjashija, linük ajunga nung PPEs anüngba ajanga tetenzük nungbo Central ministry-i COVID-19 PPEs tem peria magütsütet ta ashi.

Ken o junga ashishiba sülen ministry-i, state-i COVID-19 PPEs tonga maru tsüngda Health and Family Welfare Department ket nung aliba

sterile H1N1 PPE tem amshia atatetsü, ta metetdaksü.

Maneni pai, NHAK-i COVID-19 PPEs agizükogo aser H1N1 equipment tema ya mock drill aser training atema amshidar, ta ashi.

NHAK nung COVID-19 tashidak agi shiranger asütsü ta temulung melemba bilemba nisungtem anepaluba indang jembidang Dr Aonok-i ashiba agi, taoba ita 26 nungi yashi tashi nisung 234 screen süogo aser parnok rongnung nisung 56 kidang quarantine asütsü tuyuogo aser nisung 37 institutional quarantine süa lir. Paisa, samples 63 tendangtsü asoshi yokogo aser item sample tem rongnung 58 bo negative aser ano pongu indang osang atadar, ta metetdaksü.

Sorkari bendanglen aliba Naga nungertem yaritsüla: K. Therie

Dimapur, Rongchii/April 16 (TYO): Coronavirus tashidak prokshiba nokdangtsü mechi aliba tesem ajungalen anemponga aliba mapang Naga nungertem yaritsüla mechi linük tesem balala aser bendang lima nung marakzütepi lir. School aser college tem shibanga aliba, contract nung mapa inyakerem mapa samaba, shishilembai aortem, raliwalir, shiranger aser teyaritepertem pei kidangi maruteti aliba sorkari meteta lir, ta NPCC tir, K. Therie-i Nagaland Chief Minister dangi shidi ka züluba nung shia lir.

Anempongba tembanga sülen aika kidangi meyipa shilangtsü renemteper. Parnok kechi tensa nung arudir aruaka

parnok agizüktsü state sorkar mapa lir, kechiaser parnok State sorkar tebilemstü lir. Saka tarutsü mapatem asoshi ni sorkar nem telemtetba agitsü yutsür, ta pai ashi.

Asen nüburttem kümzüka ayutsü ya tongtipang, ta asenoki angateta lir. Parnok jajaba lenmangtem nung virus ali asü maliar asenoki meshitet. Anungji asenoki parnok state-i arudaktsütsü renema lir asü? State nung aliba nüburttem kümzüksü mechi parnok marudaktsüdi süra ajak asoshi nokdanga aliba tajungba kümra, bendanglen kidangi maruteti alir shia nem ita shia sen tajemba agi 10,000-15,000 bosa agütsütsüla, ta K. Therie-isa shidi nung ashi.



Kohima, Rongchii/April 16: Commandant Arun Deogam ketdangtsüba kübok 12th bn NDRF Doimukh indang sub-team kati COVID-19 control room, SEOC Office Kohima aser anasa aliba market area aser traffic post tem nung virus tepsetba mozü kha liasü. Parnoki sodium hypochlorite (NaOCl) aser tzü meyokteper akha, ta ashi.

Naga Cemetery nung tasü mang aremba yimya melenshitsü akhanger

Dimapur, Rongchii/April 16 (TYO): Lake View colony, Dimapur nung aliba nüburttem kümzüka ayutsü mechi yagji alirtemi pangzüng renemba osang ka Lake View colony council, Dimapur ajanga Naga Council Dimapur nem tezüluba shidi nung lemsatetep.

Lake View Colony Council chairman, Tongzuk Pongen, general secretary Liathung Lotha aser GB M. Shilu Jamir nungertemi züluba shidi nung, nisung asüba marem tsüngda Lake View colony council nem nisungbaji kechi agi asüar, iba kulikaket (death certificate)

tejangja sayutetsüla, ta shia lir. Parnokisa ashiba agi, nisung asüba aremi gari aika bener aruba nokdang aser gari ana dang melatsü aser iba den külemi leper nung nisung aremba sentong nung nisung tatakzük ka dang adentsü melatsü.

Anungji nisung ka sür tatembang sentong agiba mapang timtem mesüra mepetmesü majurutsü mechi Naga Council Dimapur ajanga nüburttem nem tim osang sangdongtsü mepishir, ta Lake View colony council ajangasa shidi nung ashi.

Ao Sendeni arrtsü... (TAPAK 1 NUNGI...)

Iba mapang parnok ano terenemshitsü nungdak kar reprangteta ashibaji, tang tashi item yimtsüngtem nung tang timtemba tensa mapang yariteptsü asoshi government-i lemtetbatem senotsü aser jangotsü shilem kecha agia tonga mali aser arrtsü anüker sepaitem agia meperir ta metetdaksü.

Mozü kitem semdanga aodanga Tuli CHC dak alaka yimtsüngtem nung aliba PHC aser sub centre-tem nungbo teka shidokba mozü sanitizer aser teni tebang nembangba mask dena kecha maka, anungji Medical nung ketdangsertemi itemjibosa

tekaratiba nung tongtsütsüla ta Ao senden lenirtemi metetdaksüogo.

Parnokisa reprangtetba ka, Yajang C nung aliba Nagaland police-tem mapang shia pei kibong dangi sen yoktsu tenung atemer uniform nung Hawaling aser Amguri leni alur aser parnokji police uniform nung asuba agi menokdangtetter. Parnok yamaji senzuba nunggi ajak atema lendong keta lir, anungji parnokji yamaji mesenzutsusa administration aser police tanishirtemi inyaksüla ta Ao Senden lenirtemi metetdaksüogo.

Dr. John Sailo Rynthathiang mang remogo

Shillong, Rongchii/April 16, 2020 (Agencies): Meghalaya nung COVID-19 wara agi mezüing asüsang Dr. John L. Sailo Rynthathiang mang Brehostibar anüingdang Lawmali kübok Riatsamthiah Presbyterian Arogo indang leper nung remogo, ta sangdong ajanga metetdaksü.

Bethany Hospital, Shillong indang Director, Dr. John L. Sailo Rynthathiang ya COVID-19 tashidak timtem balala ajanga Bodbar anepdang 2: 45 ako meta iba akümüli nungi pila oadok.

COVID-19 agi asüsang Dr. John mang ya aremtsü asoshi ambulance ka nung inoker leper tashi bener ao.

Nisungtemi PPE (Personal Protective Equipment) sübosülemtsü semer Dr. John süngden ya ambulance nung inoker leper tashi tonga bener orr agizük aser JCB (ali atuba/ ali mang nungshiba kol) ka teyari ajanga ali nung iba süngden rema yutsü.

District administration aser health department ketdangsertem matsüingdang



Arogo balala nungi sannükertemi asür Dr. John atema sarasademja liasü.

WHO aser India Sorkar ajanga tuyuba nung anidaka, asür Dr. John tasü mang rongdoktsü asoshi telemtetba agiba sülen, nüburtemi state sokar aija liasü.

Ajisüaka, iba wara prokshia

aotsü tetsübu nung Jhalupara nung lisopurtemi Meghalaya nung COVID-19 tashidak agi mezüing asüsang Dr. John mang rongdoktsü asoshi district administration nem temelaba magütsü.

COVID-19 tashidak agi asür rongdoktsü asoshi kisüjensü tajung mali aser ibaji ajanga iba

tesem nung virus tesashi ya prokshia aotsü. Iba den külemi tasü mang rongdokertemi coronavirus tashidak agi asür mang rongdoktsü asoshi yimyatem memetet aser parnok kümzüksü asoshi sübosülemtsü mesüra personal protective equipment mali, ta lisopurtemi ashi.

Dr. John tasü mang ya rongdokba sülen, iba mittsü ya süngden nung inoker, Ri Bhoi district kübok Nongpoh anasa Dr. John Sailo Rynthathiang'er farm house nung rema yutsütsü asoshi tebilemba liasü.

Ajisüaka, Nongpoh Dorbar Shnong indang Executive Committee-i Dr. John tasü mang ya par farm house nung aremtsü asoshi memelatsü lemtet.

Dorbar indang züingsemtemi ashiba agi, Dr. John tasü mang ya par farm house nung arem nungbo, iba COVID-19 wara prokshia aotsü ta tsübu bilemer.

"Tanü, Riatsamthiah Presbyterian leper nung Dr John L Sailo Rynthathiang mang rema yutsüo. Iba ama tensa ka nung nübur dang temeim sayutsü nüngdak aser Riatsamthiah Presbyterian Arogo-i aria bilemstüba mapa tajung sayuba asoshi pelaba metetdaksür. Asür tanela nem anisüingzük agüjangma," ta Twitter ajanga Meghalaya Chief Minister Conrad K Sangma-i lemsatetp.

Arunachal nung COVID-19 agi shirangsang taneptsü nguogo

Itanagar, Rongchii/April 16, 2020 (Agencies): Arunachal Pradesh nung coronavirus agi shiranga alisang indang swab sample tasembuba tendangba nung negative putetta liasü, ta sangdong ka ajanga metetdaksü.

Iba tetendangba ya Dibrugarh district, Assam kübok Regional Medical Research Centre (RMRC), Lahowal nung agia liasü, ta Bodbarnü Health ketdangseri ashi.

Shirangsang ya ya Lohit district kübok Medo yimtsüing nungi lir aser March 2020 tetenzüklen New Delhi nung Nizamuddin Markkaz kübok Tablighi Jamaat sentong nung pa-a dena liasü.

April 1 aser 7, 2020 nü iba nisungba dak COVID-19 aliba tejangja tendangteta liasü, saka Mongolbarnü tasemben tendangba nung shiranga alisang indang swab sample negative tendangtet, ta District Medical Officer (DMO), S Chai Pul-i ashi.

"Shiranga alisang indang swab sample tasembuba nung negative tendangteta pa temang tajungba kümdar. Inyakyim agi melaba ama, pa indang tasembuba test agir ghonda 24 tsüingda tanü onoki ano sample tangaka agizükogo aser tatembangbuba test atema onoki iba sample ya asüing Regional Medical Research Centre (RMRC)-i yoktsü," ta Pul-i ashi.

Pul-i ashiba agi, doctor

aser tanga healthcare worker telok 12 agi iba patient ya anogoshia anepaludar.

Tang, shirangsang dak COVID-19 wara agi kangshiba temaitsü kecha mesayur aser pa temang nung meinprongba mesüra tanga timtem temaitsü kecha mali, ta sangdong ajanga metetdaksü.

Shirangsang anepaluba den külemi mapang shia pa onoki pa dang sayubentsüdar, ta Pul-i shisem.

Tanü tashi Arunachal Pradesh nung Lohit district nungi iba nisungba dak COVID-19 putetta osang dak alaka iba wara tejangja tendangteta alir tanga nisung mali, ta kasa sangdong ajanga metetdaksüo.

Myanmar nungi shibelenba totzü apu

Imphal, Rongchii/April 16, 2020 (Agencies): Bodbarnü (15.04.2020) Churachandpur district nung Manipur police-i shibelenba totzü jenti apu, ta sangdong ajanga metetdaksü.

Totzü ya Myanmar nungi shibelenba liasü aser iba ama ozüing anema inyakba maparen dak sendakba nung police-i totzü bena aliba truck nung temulung melema bilemba nisung asem puogo.

Nisung asemi April 12, 2020 nü Myanmar nungi totzü shibelana bener arua lir ta osang tejangja ka angazükba sülen, police telok kati mita ata aser iba totzü gari ya Churachandpur tesem-i oya lia pua liasü.

Police-i pua alir nisung

asem ya Thangsuanmuan (39), Thanglianpau (33) aser Thangkhan (30) ta jangjaogo.

"Iba Shaktiman truck nung petrol barrel 15 aser diesel barrel 2 bener aliba apu," ta ketdangser sangdong ajanga metetdaksüo.

"Tang tensa dak sendakba nung ozüing agi melaba ama, pua alir nisung asemprongla ya Bijang sorkar indang quarantine centre nung yua lir," ta kasa sangdong nung shia lir.

Essential Commodities Act aser Disaster Management Act kübok par asemprongla anema ken o benokogo aser iba maparen tali jangjashitsü asoshi police-i bushisüingdangdar," ta sangdong ajanga metetdaksüo.

Tripura nung truck driver tem nem chiyongtsü agütsü

Dharmanagar, Rongchii/ April April 16, 2020 (Agencies): Assam aser Agartala lenmang nung pei pei talidaki moteti alir truck driver tem nem North Tripura Bagpasa Holy Cross indang züingsemtemi chiyongtsü tem lema agütsü, ta sangdong ajanga metetdaksü.

Osangbener den jembiba mapang Bagpasa Holy Cross nungi züingsem kati ashiba agi, "Iba ama tensa ka nung, pei talidaki moteti alir truck driver tem nem onoki akokba yari teyari balala agütsür."

Pei pei talidaki moteti alir truck drive 100 dak tema nem onoki chiyongtsü aser tzü lema agütsüo," ta züingsem-isa shisem. Kasa mapang truck drive

tem nem hand sanitizer lema agüja liasü.

Maneni, Anüdoklen tip Tripura district police-ia Baruakandi High School, Tapihum High school aser Noagang market nung alir nüngdabapurtem nem jang-otzü peria lema agütsüo.

Jang-o-tzü peria lema agütsüba dak alaka, police-isa parnok nem tejak nung inokba mask, sapon aser tanga nüngdakba osettsüsettem lema agüja liasü.

Item tesem nung nübur nem jang-o-tzü aser nündakba osettsüsettem lema agütsüba mapang lockdown ozüing agi melaba ama nisung tem kari ka dak khenyongi mekongshii aser menungtepdaksüi tetsüingda ita pilar nokdaksüo.



Guwahati, Rongchii/April 16, 2020: Alima ajunga asüingba wara ajanga India nunga lockdown anogo atsülangtsür aliba mapang ka nung, Brehostibarnü Guwahati yimti kübok Beltola, Bhagaduttapur tesem nung sensaker aser nüngdabapur tem nem NGO telok, Rising India Foundation ajanga jang-o-tzü lema agütsüba yangi noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 17, 2020

Peisasa inyaktsü mapa teimba

Yimsüsürtemi anir teinyaktsü purtemi shitak inyakdaksünüba agi imlaba ama shitak inyaka mangudang aitsür aser mepelaba zülur dangashi, tang ama alima nung wara tamajung poktetba mapang ya asenok nübortemi peisasa rajema inyaktsüba mapa teimba lir. Atangji asenok ama state tila nung nütsüng ishika yabo state government kübok pei pei department-i melamelaa anepalutettsüla ser nung, tsürabur tama chiyongdang tanurtem nem aon anünga meyutsü ama, asenokbo teti matong, meperi aser makamait agi timatemer. Ajisüaka, tang amai asen taküm, tasü o taküm na tsüngda bendangtsüba tongpang rara dangbo, shinga matai asensasa inyaktetba mapabo asenoki inyaktsü tim. Atangji, mezüngbuba government mapaji mozü kitem nung shiranger anepalutettsüsa shitak renemtsütsüla. Ajisüaka, mozü kitem aika nung, talisa CHC, PHC aser sub Health center-tem nung inyakertem asoshia dena teka shidoktsü mozü tzü aser teni tebang nembangtsü sü (mask) malitsüa akok aser itemji melira inyakertem ajak asoshi lendong lir, anungji item nüngdaktemji reprangteta yangji inyakertem yarisema asenok anasa temeket nung alirtemi tenla terara saruteper sü bushia teni tebang nembangtsü asoshi mask arrtsüa akok. Iba yabo mozü kidang inyakertem asoshi dang masü saka yimkong atema nüngdaktsü, anungji arogoia shilem tajung ka agitettsü. Ano, teka shidoktsüba mozütemji melira yimten, lokti aser arogo lenirtemi asüngdangtepa bener arua mozü kidang inyakertem aser nübortem nem agütsütsüa akok. Tashidak nungi jenbuttsü merangba yabo government nung inyakertem asoshi langka tajung inyaktsür masü saka nübortem ajak taküm kümzüktsü asoshi lir, anungji peisasa pei mang merüka alitsüba, metsü mashi nung memetsütsüba, tangar ajurua kimalen mesenzütsü, temang tashi itita alitsü atema chiyongtsü shitak achitsü, tzü talem nung metsü enoker anogo nung terok anaben asemben shidoktsü, moko sali machitsü, temang nung asentzü sendoka exercise agitsü, amui oshia oa mejangtsü aser akok tashi pelaa alitsü merangtsüba mapatemjibo asenoki shinga daka meimlai inyaktsüla. Ano, asenok asoshibo tajung kaji, iba ama mapang nung akok tashi tzümalen nungi bener atuba shi ango nungi shir aonsutsü tashi machi arema asen lima nung angubatem bushia achiba aser züsenba sobaliba tajung tenzükshitsü mapang tajung ka südaktsütsüla. Tangalen nungi prokshiba tashidak agi, kechalenia mao ki shibanger amongtsüba tensa mapang ya, tang ya tatembang masü saka tetenzüker dang lir, anungji item tarutsü anogotemji bilema asenoksasa asenok taküm litettsüsa tulur tilar ajaki aluyimba nung temulung agütsü tenzüktsüla. Tang yabo asenok ya center government-i relief jang seret nung senpak asema agütsür, ano tangbo angatia agütsür. Item jangtemji tang lenirtemi pei jangpong nungi yateta agütsür amai tiaksanga agüja arur. Iba jagi asenok pelar, anungji tenüngsang agütsür. Ajisüaka, kodang asenoki iba tiaji jungjunga bilemdangdir, asenok ya India government-i ayuba zoo nung alir shiruru kin tapu ka dang mesük. Asenokbo odang kazüa alitsü aser kodang chiyongtsü bener arutsüdir raktepa achitsü aser iba sülen asenok o asenok na ngutepa amongtsü. Iba shisatsü aser zoo kolok nung jagi asenok pilatsüsa aser relief janga medenia asenoki züsentetba agi asenok taküm aser kibong litettsüsa asenoki inyaktettsüla. Tangbo joko government-i magütsü, parnoki bener marutsü, ozübo mangu ta masü saka akok tashi peisasa pei nüngdak peridaktsütsü merangdi.

OLEMSABANG

TSÜNGREM AIN TESASHI AJURUR

- Süpongünsang Longkümer, Darogapathar Dimapur

Tamasa ocet azünger dangi khrista temeim salem apenür. Amangbapurtemi ajurutsü Lai tapu, aser mamangertem dak atalokaka mangatettsü, amangaka Lai mazüngertem mangatettsü. JA 6:1-17 JA rateteri züluba tapak 86-91 tashi nung tera tongmelangba agi amangbapurtem den lemsatepber kechaser iba lai ya tarutsü mapang asoshi kanga nüngdak ta bilema zülutsür. t.6: 1,2 temaitsü tenet ajenba kaketji kodang San chanui(Yisu khrista)lapok idangji ola tulu agi "Arung"ta ajaba ajanga Yohani reprangzüka yok nung kor temesüng ka liasü. Kor temesüng agi temeshi toyur asünung aikati Yisu ta ashir saka aji Yisu masü ta kuli aika lir. 1 Mezüngpuba nung Yisu khrista (San chanu) jagi atsüa aliba kaket longji Yisui lapok nung Kor temesüng nung amensangji koda sür Yisu asütsü? Tanapuba nung temesüng sülenji Kor asem jagi alima teraksa adokdaksü. Anungji Kor temesüngjia alima raksar ka mesüra temenen ain Kor ka. Tasempuba nung 1 Yoh 2:18aser math 24:5 nung ashi ama tiyazü khristai aika mashileni anitsü ta shia alinung aji tiyazü khrista ta rateter. Mojingi Yisu jilo aiba mapa kar yamai lir. Kongsa tanüla temeshi lir, idakji temenen tanüla arur; kong khrista arogo lir, idakji mojing (Tiyazü arogo lir, Kong Tsüngrem San chanu lir, idakji tiyazü mojing san chanu lir. Ano Tsüngrem yimti Yirusalem lir; yamaji satana yimti ka Babelon lir. (2 kor 11:14,15 aser JA13:11, 19:20) Ratet zülur aikati iba kor ya Antichrist ta rateter. Kong teraksar aser tejangjunger litir idakji tesünep malir. Iba Kor nung amenbai lijak ka am aser takokeri kokyonga aoba ama makyonga aser kokyonga ao. t 2 Temaitsü tanapubaji Yisui lapok, taküm shiruru tanapubai ya shia angashi "Arung" idangji kor temerem ka adok. "Temerem tetezü lendong" Yimjung agiendaktsütsü iba manung amenba nem temelaba agütsü aser pa nem nok tuluka agütsü. T 5,6 Temaitsü ajenba tasempubaji Pai lapok (Yisui) Taküm shiruru tasempubai ya shia aliba Yohani angashi "Arung" Pai repranga yok nung Kor tanak ka nung amenba ket nung seret ka aüma liasü. (ama, or mesük, Teka nung ama, melena aüma ta inoktanger o mepulutsü yimlar) Tanak tetezü tasüba aser mangyim jashi tammang tiya, seret tetezü tuozük, puzüng ka dang Wheat seret ka nung sen ka Barly seret asem nunga senbak ka, tetezü aya wara, Totzü aser yi dak tekongshi. Tsüngrem sentongang meimchiri memetet. T 7,8 Kor pulapular tetezü sentsü mait tashidak, Wara tashidak tamajung. Agüja aliba Lai tapu ajak zügangma Ja 6:15, Hos 10:8, Luk 23:30, 6:17 Yoe2:11, Mal 3:2. JA6:16 Chuba menden nung amenba tejak nungi, aser iba San chanu ain adokba nungi onok atsükokdakjang!. Küm tenet rishikangshi yamaji atalokyonga aotsü südi.

JA 1:18 Aser taküm alibaji, ni tasü liasü, saka ajiang putusa putu ni taküm alir, aser tasüba o tasü yim na süngkümrütsü (Sabi)kü ket nung lir. JA9:1 Idangji tenyar pungupubai pei jangzüji apu. (Tenyar, Kotak tenyar) aser anüng nungi alima dangi petinu ka tsükba ni angu. (Satan) aser ponglang makaba süngkümrütsü pa nem agütsü. Satan nem agütsü. Eyp nung temerenshipo Tsüngremi tashidak yoka merenshi, saka Küm tenet rishikangshi, Satani ashiochtsüba temenenpurji satanisa merenshitsü Laishibai sayur. Saka Israel nunger 1,44,000 dak temaitsü ajenbatem dak tenütsü nung temaitsü majen tashi tekangshi. 7:1-8 Yihuda nunger telok. T 9-12 Kin, kidong, nüpu aser oshi itemi bendanger telok kasa itemia 1,44,000 yongsük alitsü toyur. Tesa 2:3-10 tashi mangasang, aser ozüng mangasang tetezü alima ozüng aser alimai ashiba indang masü Taküm Tsüngrem tang tashi mangasang aser temeshi ozüng mangasang shirnok samadake parnok dang ajar ta angajemti. Corona virus atemapo Abreu e Brazel nungerpo yimtung nung Ao ken 173 Mera li nung alir, iba ken ya tena tekülem agia sarasatema tashidak wara den raraba angur. Ni amanger ibai tamang tongpang kuli asütsü südi. ta manene lemsateper.

Anogo shia Tsüngrem den Ochiba nung nokdaker ajak Tsüngremi moajangma. Asenok dak tajung meliaka Tsüraportemi Naga lima khrista meyong ta ayongzükbaba nung Pai temaitsü ajenba ajanga Naga nunger India ajanger aika prokshia liaka, aser pei lima nunga tang tashi CORONA VIRUS (Wara) makae Kümzükba asoshi Tsüngrem tenüng sangti, ano manene Tsüngrem dang khanga tekümzük meshia sarasatema liti. Amen.

TEMOLONG NUNG KONGSHIBA KAR LEMSATEPER

Anogo shia yimobilem aser olemsabang azüngtsü yongaya atar. Iba den ano osang aika angashir yimobilem 13-4-2020 (ano ayarbo masü) Naga nungertem ajak ya kidang achi ajemtsübo peria akaba agi government nungi tangutsü tim manguyonga ola madoker asü mesüra memetetba agi ola madoker. Ta asüba agi ni temolungjang nung tsüngoko, kechiba yamai züzüa alir ta bilemer. ST. Yapang nungeri tamalen RTI tangi application koma zülutsü item ajak paper nung agütsüogo. Anüngi ajaki tepang masü mapa akümtsü marangdi ano 14.4.2020 State sorkari temulung agüja inyaktsüla ta DALI-i züluba tu hoa ta temulung nung kongshia züngogo kanga pelar.

Nenek ochibaji Tsüngremi moajang ta ozü sarasadem.

- Alemla, Chumukedima.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Coronavirus agi Africa nung Khristantem tamajungba kongshitsü



Pastor kati Khristianpurtem atema sarasademtsüba yangi noksa nung angur.

April 12, 2020: Tang coronavirus tashidak agi alima tesem ajaklen nisungtem timtemdar, ajisüaka iba tashidak agi tamajungtiba kongshirtemji Africa nung reshikangshi tia nung aliba Khristantem asütsü, ta osang ka ajanga metetdaksü.

Africa nung Khristantem aikati shi nung timtem ajuruba dak masü saka mapa makai akümer aser kibong züngsemtema majurutetba tensa ka nung lir.

Alima nung Khristantem atema tepela tulutiba anogoji Yisu Khrista tasü nungi shia aruba anogo-Easter Sunday liasü, ajisüaka takumbo alima tesem aika nung Khristantem adenshia tekülem sentong magiteti liasü.

Ajisüaka ano iba dang nungjagi tamajungtibaji, coronavirus tashidak den külemi Khristantem reshikangshiba linüktem nungbo Khristantemi meshitetba timtem ajurudar.

Item linüktem nungjibo küm shia Khristan million aikati odiodia Easter Sunday momongteter.

Nigeria kübok state 12 nung Khristantemibibo reshikangshi tia kanga ajurur, kechiyong item tesem nungji Sharia (Islamic ozüing) lir. Anungji item tesem nungjibo coronavirus tashidak agi shirangaka Khristantemi medical teyari junga mangutsü,

Arogo Ministry atema Live video training ka ayongzükogo

Kohima, April 16 (TYO): Nagaland nung amenoka aliba organization- Pinnacle Skills aser VIT AP School of Business (Branch of Vellore Institute of Technology) nungi Prof. Samuel Johnson-i pastor tem, Theology college tem nungi staff tem aser Church IT staff tem atema live video training program ka ayongzükogo, ta osang ka ajanga metetdaksü.

Iba training program ji Zoom nung April 22, 24, 27 & 30 anogotem nung anepdang 10:00

mapa makai akümtsü, alu nung takoksa jenti angutsü, aser item kuli ajanga tebang agi meshitetba timtem kanga ajurutsü.

West Africa nung kiralongrar tekok, Boko Haram-i mapang shia Khristantem puer oa tepseter. Iba denji külemi Muslim Fulani kiralongrartemia Khristantem meyirjang aika tepseta arudar.

Anungji item kuli ajakji ajanga Africa nungbo coronavirus tashidak ajanga Khristantemi timtem tulu ajurutsü.

Humanitarian organisation PSJ UK-i ashiba agi, Africa nung coronavirus tashidak kanga prokdar, aser tang tashi nung nisung 10,000 dak iba tashidak putetogo aser nisung 500 dak tema süogo.

Ano talisa Khristantemsa süaka tetsür-tanurtemi kanga timtem ajurutsü. Talisa Nigeria kübok Borno state nung camp balala nung jenoka aliba nüburtem kanga timtemtsü.

Africa nung healthcare den külemi rongsenkettsüing jenjang junga mali, anungji iba continent nung coronavirus tashidak kanga bulua prokra nisung jenti asütsü.

Osang angazükba agi, Central African Republic nung nisung million 5 jungnüa lir saka nütsüing paikaji atema

ako nungi 12:00 ako tashi agitsü. Tanü putu nung Internet/ Technology/ Social media/ Digital tools ajanga Arogo züngsemtem den dang masü saka alima tesem ajaklen nüburtem den tongteprateptsü atema Arogo nem maongka tulu agütsüogo.

Coronavirus tashidak nokdangtsü atema linük tesem ajak shibangba ajanga asenoki technology koda tongtibang, ibaji metetogo aser joko Arogo aikati online ajanga tekülem

ventilators bo 3 dang lir.

Tang iba ama tensa ka nung Africa nung Khristantem densema timtemertem yaridi asünunga Sharia ozüing aliba linüktem nungbo timtem kanga ajurutsü.

Open Doors-i ashiba agi, taoba hopta kija nunga Nigeria nung Khristan 40 shi tepsetogo.

Alima nung Khristantem tamajungtiba reshikangshiba linüktem tarensen nung Nigeria jenjang 12buba nung lir (Open Doors World Watch List 2020). Kasa list nung Syria jenjang 11buba nung, Saudi Arabia 13buba nung, Iraq 15buba nung aser Egypt jenjang 16buba nung lir.

Tawa Open Doors USA president aser CEO, David Curry-i, "Onoki iba tarensen ya lenla ajaklen nungi asadanger, aser item rongnung Arogo nung züngsem süa aliba jenjang, linük nung senso ka jenjang, loktiliba jenjang aser nija taküm jenjang densema lir," ta metetdaksü.

Yaküm December 22 nü nunga Borno state nung Boko Haram kiralongrartemi passenger bus ana amakdang Khristantem tepset saka Muslim nung passenger tembo chioka liasü. Iba tatalokba nungji Deeper Life Bible Arogo nung pastor ka den par kinünger ka aser meimchir temeim mapa inyaker ana puer oa liasü.

sentong agir.

Iba training course ajanga Arogo ministry nung inyakeritemi technology tools angazükba ajanga kanga tajangzük angutsü.

Iba training atema osang tejangjaba metettsü atema program coordinator, Prem Kumar Kothapalli den 9182483918

/ prem.kumar@pinnacleskills.in ajanga tongteprateptsü akok aser www.pinnacleskills.in nung reprangtsü akok.

ANO GO ABEN TSÜNGREM DEN

TATALOKBA KA SÜLEN

Tasüngdangba ka atema telangzüba yakta angutsü teimla nung ozü jalai la medemer ka dangi text message ka yok. Lai yokba message medemeri lapoka azüing. Medemer nungi telangzüba angutsü kanga yongya-a ata. Saka kodang medemer nungi mapang shitak nung telangzüba mangu ozü jala tezü atang. Mapang talangka süiaka medemer nungi telangzüba mangu nung dena tsüngda tesendaktep raksa südi ta ozü jala shisabulu. Iba mapang la medemer nungi telangzüba ka angu aser dena tesendaktep nung timtem mali ta lai angateta pela. La nem tejangja aser tapet telangzüba agütsütsü merangdang menuba liasü.

Kodang Daniel-i rara tulu atoktsü mangdang angu pai lungmia sarasadem (tk 3,12) saka Daniel-i hopta asem tashi sarasademaka telangzüba mangu. Tatem nung kotak tenyar ka Daniel dangi atoka "Tamasa yongi ne sarasadem angashiogo" ta ashi. Hopta asem süirang kotak tenyari Danierl dang ne sarasadem angashiogo ta ashi saka Tsüngremibo pai sarasademba mezüing anogo nungi angashir liasü.

Khen khenbo aseni aginüba mapang nung Tsüngremi sarasadem melangzüksü akok. Idangji Tsüngremi ni memeimer asü? Ta bilemer. Aji saka shiri Tsüngrem meimer parnoki sarasademba Pai teti langzür ta Daniel otsü ajanga asenoki angateter.

Easter anogo nung China sorkari melaba Tenla ki ka bendoktsüogo

April 16, 2020: Easter Sunday anogo (April 12) nung China sorkari temelaba agüja aliba Tenla ki ka bendoktsüogo; Easter Sunday nung China kübok Qinghai province nung aliba Donghu Arogo Tenla kiji sorkar ketdangsertemi bendoktsü.

Ib Tenla kidangji Khristantem küm 20 dak tema tekülem agia aruogo, anungji iba Arogo nung Khristantem aika melung raksa, ta osang angazükter.

2003 küm Donghu Arogo ya "Three-Self Church" ka aküm. Tetezü iba Arogoji China sorkari agizüka official register nung züngokba Arogo lir.

Chengxi district nungbo iba Arogoji tulutiba aser tejentiba Arogo liasü aser züngsem 300 dak tema liasü. Xining City Government- IPK Media-i ashiba agi, parnoki Li Zhennan (local religious bureau tongti) den senteper Khristan yimsü anema inyaker.

Joko tesüiba küm ana tashi ketdangsertemi Donghu Arogo shibangtsütsü atema asalentong yanglua liasü, aser tang atangji nung iba Tenla ki bendoktsüogo.

2017 küm December ita nung fire department-ia iba

Tenla kiji bendoktsütsü meranga liasü, saka putir aika adenshia longkak aita ajanga Tenla kiji mebendoktsü.

Ajioda Arogoi kimong tasen ka nung Tenla ki yanglutsü asüingdang saka ketdangsertemi memela. Maneni 2019 küm Arogoi kimong tasen ka nung yanglutsü asüingdang, saka ketdangsertemi memelung.


Persecution watchdog- China Aid-i ashiba agi, tawa ketdangsertemi Tenla kidang light mesangoka alibaji raksatsü, ibayongji hopta ana tashi amangbapurtem light makai tekülem sentong agia aruogo.

Iba Arogo nungji lenir, Li Xuejiao-i, 2020 küm Tenla kiji bendoktsütsü ta ketdangsertemi amokmerena liasü aser tatemsa Easter Sunday nung bendoktsüogo, ta metetdaksü.

Tawa China nung aliba underground Arogo ka nung züngsemtem peipei kidang Zoom ajanga Easter tekülem sentong agia liasü. Iba dak sendakba nung police-i Early Rain Covenant Church nung lenirtem apu. Iba Arogo nung tepoukdak yua lir. Pai odiodia

China nung communist sorkar aija aruogo.

OLONG PAITEP # 5430



- TIPILEN**
- 2. Teburtemi tejak nung awaba - (8)
 - 6. T _ _ _ em - (3)
 - 8. Tzük ayudak - (3)
 - 9. Nüngdakba dang timba - (6)
 - 11. Züina ao - (4)
 - 12. Yangi tzü angur - (5)
 - 14. Tangar dang nungi tali - (4)
 - 16. Senyong masü - (6)
 - 17. Oadokdi - (3)
 - 18. Tzü tarok - (3)
 - 19. Yimtaklir aikati iba ya ki den külemi yanglusemer - (8)
- LANGTSÜNGLEN**
- 1. Temejangdak - (6)
 - 3. Nisung ka mapa inyaksü nübo- (4)
 - 4. Azüntsü asoshi mejemba - (6)
 - 5. Tesangwa agütsüba - (5)
 - 7. Tila masü - (4)
 - 10. Tebenjem tetsür chanu - (4)
 - 11. Tekolak nung inok - (4)
 - 12. Tetsüngda - (6)
 - 13. Tangar inyakba ka inyak - (6)
 - 14. Tim masü ta ashi - (5)
 - 15. Asalendong - (4)
 - 16. Tanü dangtsü - (4)

OLONG PAITEP # 5429 TELANGZÜBA

- TIPILEN :**
- 1. Telok, 4. Aluru, 6. Ozüng, 8. Emk,
 - 9. Kin, 10. Teti, 12. Süir, 13. Jen,
 - 14. Ola, 16. Talak, 17. Mazük.
- LANGTSÜNGLEN :**
- 1. Tenükjang, 2. Luden, 3. Kiochtsü,
 - 5. Lenti, 7. Tajangzük, 11. Teronem,
 - 12. Sempa, 13. Jahaz.



Mr. Alokbai state nung Covid-19 tashidak maliba osang neburtem dang sangoktsur :

Hi... Helloooo.. Helloooo.... Nebur tajungtem, Asenok lima nung kechiba COVID-19 tashidak agi matonger ta süra tatsü agi yamai :

- 1. Asenokji kanga tekümdang,
- 2. Mapang shidak nung pei sasa quarantine asür,
- 3. Tera suspect süra pei kidang miimshia amunger,
- 4. Aser tatemsa tongtipangtibaji asenok ket nung testing kits kecha maliba ajanga COVID-19 tashidak Zero ta ni nüma danga ajak dang ayimoktsür!!!!



TANÜBO NAI LANGZÜANG

Q. COVID-19 wara anema raratsü asoshi DRDO-i yangluba COVSACK ya kwi jenjang?

- A. Sen lakh 1
- B. Sen lakh 1.5
- C. Sen lakh 2
- D. Sen lakh 2.5

(Taruba adok nung onoki langzüksü)

YASHI ADOK TELANGZÜBA : Goddess Durga



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAI-A YA METETTER MA?

ALIMA NUNG JENJANG TULU AKETBA SMARTPHONE KAR: 2020

- 1. Falcon Supernova iPhone 6Pink Diamond - \$48.5 Million
- 2. Stuart Hughes iPhone 4s Elite Gold - \$9.4 Million
- 3. Stuart Hughes iPhone 4 Diamond Rose Edition - \$8 Million
- 4. Goldstriker iPhone 3GS Supreme - \$3.2 Million
- 5. iPhone 3G Kings Button - \$2.5 Million
- 6. Diamond Crypto Smartphone - \$1.3 Million
- 7. Goldvish Le Million - \$1 Million
- 8. Gresso Luxor Las Vegas Jackpot - \$1 Million
- 9. Goldvish Revolution - \$488,150
- 10. Virtue Signature Cobra - \$310,000

SUDOKU # 5472

TELANGZÜBA # 5471

7				3		9	2	1	7	2	8	6	5	9	4	3
		1	7	2	8		6	5	9	4	7	1	3	8	6	2
2			5			1		8	3	6	9	4	2	5	7	1
8			9			7		7	2	8	3	9	1	4	5	6
6						5		4	1	9	5	7	6	3	2	8
9	4			3				6	5	3	2	8	4	7	1	9
3	8		1		4		5	3	8	1	4	2	7	6	9	5
1		6		9		4		9	6	7	1	5	8	2	3	4
	2	7				8	1	2	4	5	6	3	9	1	8	7

OJANG LUTEP # 5020


- AIN : □□□
- ETMETBA : □□□□□□□
- ERAS : □□□□
- GAZANÜKBA : □□□□□□□□□
- RYAI : □□□□
- APMA : □□□□
- ANGAJA : □□□□□□
- EMJITI : □□□□□□
- NYAIKA : □□□□□□
- LAUTSSAYÜ : □□□□□□□□□

OJANG LUTEP TELANGZÜBA # 5019

TESHISADANGBA TAJUNG MELIRA ASENI INYAKBA MAPAREN KECHA NUNGA TANANG MECHITETTSÜ

TAN HOPTA ATEMA - KOMA SÜLA ?

Q. Nagaland nung alirtembo joko pei mapai akhi ama aotsü saka ano ita ka Nagaland alema shinga maotsü aser Nagaland-ia shinga marudaktsütsü ta asununga koma süla ?



New Delhi, April 16, 2020: Brihostibarnü Upa-Rashtrapati Bhawan, New Delhi nung linük tatong Tir, M. Venkaiah Naidu aser Agriculture & Farmers' Welfare, Rural Development & Panchayati Raj Union Minister, Narendra Singh Tomar na senden amenba noksa nung angur.

Ghonda 24 tsüngda nisung 941 dak coronavirus putet; 37 asü

New Delhi, April 16 (Agencies): India nung tesüiba ghonda 24 tsüngda nisung 941 dak coronavirus tashidak putetogo aser ibaji densemabo tang tashi nung nisung 13,000 jungnüa dak iba tashidak puteter, ta ketdangsertem osang ka ajanga metetdaksü.

Tang India kübok COVID-19 agi tamajungtiba kongshiba state ji Maharashtra lir. Maharashtra nung ano nisung 107 dak dak iba tashidak puteta ajak agibo 2,919 jungogo.

Brihostibarnü Delhi Health Minister, Satyendar Jain-i, Delhi nung coronavirus tashidak agi shiranger shilem 68 bo taoba ita Markaz Nizamuddin, Delhi nung ayongzükba Tablighi Jamaat senden nung adenertem lir, ta metetdaksü.

Coronavirus tashidak anema raratsü atema India-i China dang nungi alizükba Rapid Antibody Tests aser RNA Extraction Kits lakh 6.50 Brihostibarnü tonga aruogo.

India Ambassador to China, Vikram Misri-i sangdong ka ajanga, Brihostibarnep southern

China kübok Guangzhou Airport nungi medical kits ji India dangi yokogo, ta metetdakja liasü.

COVID-19 nokdangtsü atema taruba hopta ishika tsüngda healthcares workers meyirjang aika dak iba tashidak tendangtsü, item rongnung Max Healthcare kübok hospital tem nung inyaker 18,000, BLK Hospital nungi 3,000 aser Nanavati Hospital, Mumbai nungi 3,000 densema tendangtsü, ta ketdangsertemi metetdaksü.

Iba tashidak timba putetba state- Maharashtra (2,919) sülen Delhi nunga nisung 1,578 aser Tamil Nadu nunga nisung 1,242 dak iba tashidak putetogo.

Maneni Madhya Pradesh nung 1,120, Rajasthan nung 1,023, Gujarat nung 871, Uttar Pradesh nung 773, Telangana nung 698 aser Andhra Pradesh nung 534 dak iba tashidak putetogo.

Karnataka nunga nisung 315, Jammu & Kashmir nung 300, West Bengal nung 231, Haryana nung 205, Punjab nung 186, Bihar nung 74, Odisha

nung 60, Uttarakhand nung 37, Himachal Pradesh nung 35 aser Assam aser Chhattisgarh naprongla nung semer asemsem (33) dak iba tashidak putetogo.

Jharkhand nung 28, Chandigarh nung 21, Ladakh nung 17, Andaman & Nicobar Islands nung 11,

Meghalaya, Goa aser Puducherry shia nung tenetnet, Manipur aser Tripura na nung anana aser Mizoram aser Arunachal Pradesh na nung kaka dak iba tashidak putetogo.

Tang tashi nung India nung iba tashidak agi nisung ajak agi 414 süogo, asürtem rongnung Maharashtra nung nisung 187, Madhya Pradesh nung 53, Gujarat nung 33, Delhi nung 32, Telengana nung 18, Tamil Nadu nung 14, Andhra Pradesh nung 14, Punjab nung 13, Karnataka nung 12, Uttar Pradesh nung 11, West Bengal nung 7, Jammu & Kashmir nung 4 aser Kerala, Haryana, Rajasthan shia nungi asemsem, Jharkhand nung ana, Meghalaya, Bihar, Himachal Pradesh, Odisha aser Assam shia nungi kaka densema lir.

Linük 53 nung India nunger 3,336 dak coronavirus putetogo

New Delhi, April 16 (Agencies): Linük 53 nung India nunger 3,336 dak coronavirus tashidak putetogo aser parnok rongnung 25 süogo, ta Brihostibarnü sorkar ketdangsertemi metetdaksü.

Sorkar ketdangsertemisa, bendanglen oa aliba India nungeri aremzüka atatsüla, kechiyong linük nung iba

tashidak prokba nokdangtsü atema parnok anir maruteter, ta metetdaksü.

Kasa osang ajanga ashiba agi, India-i anti-malarial drug hydroxychloroquine mozü linük 55 dangi yoktsü atema telemtetba agiogo, ta metetdaksü.

Bendanglen nungi medical osettem bener aruba dak

sendakba nung ketdangsertemi, India-i South Korea aser China na nungi coronavirus atema medical osettem alir, ta metetdaksü.

Coronavirus anema raratsü atema India-i Germany, US, UK, Malaysia, Japan aser France linüktem dang nungia medical osettem alizüktsü, ta ketdangsertemisa metetdaksü.



Prayagraj, April 16, 2020: Brihostibarnü Uttar Pradesh kübok Prayagraj nung ketdangsertem tetuyuba alema inyaker nisung ka police-i apuba noksa nung angur.

India kübok district 325 nung COVID-19 meputet: Health Ministry

New Delhi, April 16 (Agencies): Brihostibarnü Health Ministry-i, tang tashi nung India nung district 325 nungbo COVID19 tashidak ka danga meputet, ta metetdaksü.

Health Ministry nung Joint Secretary, Lav Agarwal-i, "World Health Organisation indang national polio surveillance network services amshia survey agitsü atema asalentong renemogo," ta metetdaksü.

"Yashi Health Minister & MoS, Health-i video conference ajanga World Health Organisation nungi health ketdangsertem aser field officers den senden ka menogo, aser iba senden nungji district level tashi nung COVID-19 nokdangtsü atema o lemtepogo," ta paisa

metetdaksü. Agarwal-isa, China nunger company ana dang nungi India-i rapid antibody test kits densema tetendangba kits lakh 5 dak tema nguogo, ta metetdaksü.

Health Ministry-i ashiba agi, Indian Railways-i coronavirus agi shirangertem atema isolation beds 10,500 tema dak renemogo aser April 15 tashi nung Indian Railways-i chiyungtsü angati lakh 16 dak tema lemtsüogo.

Indian Council of Medical Research-i, tanü tashi nung nisung 2,90,401 dak nungi samples agizüka coronavirus tashidak tendangogo aser iba nungji yashi samples 30,043 tendangba densema lir, ta metetdaksü.



New Delhi, April 16, 2020: Brihostibarnü New Delhi nung Congress lenir, Rahul Gandhi-i video link ka ajanga COVID-19 dak sendakba nung osangbenertem den jembiba noksa nung angur. Rahul Gandhi-i linük tesem ajaklen coronavirus tashidak tendangtsüla, ta jembia liasü.

Mask agitsüla, tangar anasa maotsüla: MHA

New Delhi, April 16 (Agencies): Brihostibarnüa maneni nüburtem dang tekümdangtsü metetdakja Union home ministry-i, coronavirus tashidak nokdangtsü atema linük shibangba maparen takok angutsü asoshi masks agitsüla, tangar anasa maotsüla aser public tesem nung nisung pongu dak tema madenshitsüla, ta metetdaksüogo.

New Delhi nung osangbenertem den jembidang Union home ministry nung Joint Secretary, Punya Salila Srivastava-i, public tesem nung nisung pongu dak tema madenshitsüla iba denji külemi lokti aliba tesem aser mapa inyakba tesem nung metsü memetsütsüla, ta metetdaksü.

Laisa, temang manemi aliba teintet sensotem aser tanur tila aliba tsüraburtemi kidang nungi dang mapa inyaksüla, iba denji külemi mapa inyakba tesemtem nung temperature screening ayuba den hand sanitisers amshitsüla, ta metetdaksü.

Ketdangserisa, linük shibangba maparen takok angutsü atema yi, pan masala aser moko chiyungtsütem nokdangtsüla, ta ashi.

Ato kilonser, Narendra Modi-i maneni May 3 tashi linük shibangtsü sangdongba sülen Bodhbarnü home ministry-i telatetba balala metetdaksüba den külemi states aser union territories dang item telatetbatemji junga benoka inyaksü tuyua liasü.

Tang linük shibangba dak sendakba nung Srivastava-i tayimtsü, train aser road transport memelatsü, ta metetdaksü.

Iba dak alia taxi, auto rickshaws, cycle rickshaws aser cab aggregator service memelatsü aser shishaliok reju ajak memelatsü, ta laisa metetdaksü.

Ketdangseri, malls, sports complex lapoktsü memelatsü aser sobaliba den tamangba yimsü dak sendakba lokti sentong kecha memelatsü, ta metetdaksü.

Hotspots masüba aser containment zones nung madenba tesemtem nungbo April 20 nungi tenokdangba kar agientsü, ajisüka telatetbatem nung aliba ama inyaksüla, ta ministry-isa metetdaksüogo.

Nija aser public sector nung inyakerterem dang Aarogya Setu app amshitsü atema ajungshitsüla, ta laisa mepishia metetdaksü.

Tzüyim nung Rohingya nung 24 asü South Korea tir Moon'er teloki takok angu

Rongchii, April 16, 2020 (Agencies): Tzüyim nung Rohingya nung 24 asü, kong parnok mena aliba rong yagi Malaysia metongtet, ta Bangladesh nung aliba tzüküm anükertemi Bresthostibarnü ashi. Iba rong ya Malaysia metongteti tzüyim nung hopta ishika bongdaka aliba mapang item tanükertemi Rohingya nung nisung 396 kümzük.

"Parnok tzüyim nung ita ana jungnüa liasü aser yaseta liasü," ta tzüküm anükertem nungi ketdangser kati osangbener dang ashi.

Item kümzük alirtem ya Myanmar-i meyipa yoktsü asoshi telemtetba agiogo, ta ketdangsertemi ashi. Coastguard temi mezüngbo nisung 382 kümzük ta shia liasü, saka mapang tatsüka lir melenshia timba aküm.

Video kar sayaba nung tetsür aser tanur timba sür aser karbo kanga kongrar aser junga menokdakteti tzükümleni anir aruba nguogo. Refugee kati osangbener dang ashiba agi, par

telok ya Malaysia nungi asemben tashi meyipa yok aser khenbo rong nung mena alir aser rong ketdangsertem raratep.

Myanmar nungertemi Rohingya nung ya par senso ama mezüngshir aser parnok senzüsempongba, mapa bushiba, healthcare aser education kanga sashia nokdang.

Mitkartemi tashiyim amshiba ajanga 2017 küm Rohingya nung meyirijang aika linük nungi jena ao aser anüolen Rakhine state nung azüdokshi manener, kong nisung kar süki tamajung nung jenoka lir.

Bangladesh-i jena arurtem Myanmar den arrtsü anasa refugee camp tem nung alir, aser iba dak sendakba nung kin ajunga samatsütsü merangba ken o International Court of Justice ajanga bushisüngdang südagi.

Myanmar-i Rohingya nung reshikangshia mamshi ta ashir aser linük nung putu aika liaka parnok ya lisopur masü, ta ashir.

Human rights telok kati

ashiba agi, coronavirus mechi Thailand aser Malaysia nung tesem ajunga shibanger aliba ajanga Rohingya nung bena aliba rong aika ano tzüyim nung alitsü ta amanger. Linük ana ya UN refugee convention nung medenaka Muslim nung timba aliba Rohingya nungertemi iba linük ya kanga sabur.

April 5 nunga Malaysia ketdangsertemi northwest tsütsü Langkawi asetkong anasa rong ka nungi Rohingya nung nisung 200 dak tema apu, kong tila tanurtema dena liasü.

February ita nunga Teknaf nung aliba refugee camp tem nung alir Rohingya nung nisung 15 mena aliba ronf ka Bay of Bengal nung mükepoka asü. Parnok ya Malaysia-i aoba mapang iba lendong ya atalok, ta osangtem ajanga ashir.

Küm aika Rohingya nungertemi November nungi March tsüngda Southeast Asia leni aotsü meranger, kechiaser iba mapang tzüyim tesüngjemba alir.



Moon Jae

Seoul, Rongchii/April 16 (Agencies): South Korea Tir Moon Jae-in'er ruling party ajanga parliamentary election nung takok tajung ngutet, ta Bresthostibarnü sangdongba nung shia lir, kong coronavirus tasenba kanga junga azüoktetba ajanga takok anguba nung yarisem.

Iba election ya alima ajungai repranga liasü, kechiaser tashidak wara agi alima asüngba sülen tang mezüngbuba election ya agi.

Ketdangsertemi tashidak nungi nüburtem kümzüktsü mechi mera tajung agia polling station ajak (14,000) nung mesen asütsü mozü azük aser vote agütsürtem mask agidakja parnok temang temperature tendang, hand sanitizer aser plastic glove amshidaksü aser nisung ka nungi ka tepila lidaksü.

Taoba hopta tatemlen jelia vote agütsüdaksüba sülen Bodhbarnü agiba election nung vote agütsür nütsüng yongsük shilem 66.2 liasü, koba 1992 sülen agiyonga aruba parliamentary election rongnung timtiba, ta National Election Commission ajanga ashi.

Coronavirus agi shiranger nisung 2,800 shi nem mail mesüra tsüngdong arua vote agütsüdaksü, kong parnok atema polling booth balaka renemtsü, aser pei sasa anemponga alir nisung 13,000

dak tema election mapang tembangba sülen vote agütsütsü mela.

China nungi poktetba wara, COVID-19 yagi February ita South Korea nung mezüng kongshidang Moon aser par Democratic Party jenjang mejungi aküm, kong eongsenketsüng nung mainba aser linük telungzük yimtenren nung tai tongloktsütepba agi sünger liasü.

Saka iba sülen ketdangsertemi iba virus anema kanga junga rara aser Moon aser par party jenjang tajungba aküm.

Chamber ka dang aliba parliament menden 300 nungi par teloki menden 180 nguteta tang aliba dang nungi menden 60 agi timba aküm. Conservative opposition teloktep ajanga menden 103 angu, ta National Election Commission ajanga ashi.

"Linük nung timtem ajangshia aliba ajangtetsü asoshi asenoki kanga meranga inyakbayong nüburtem election ajanga tashi tasen agütsü," ta Moon-i sangdong ka ajanga ashi.

Parliament nung par teloki menden timtiba anguba ajanga Moon-i kümsük ana anünga aliba mapang pa nükjidong tongtetsüsa inyaksü.

South Korea nung coronavirus kanga sashia tendangba aser iba tashidak pokloka aortem kanga junga bushiba ajanga wara azüokteta lir, aser World Health Organization aser danga linüktem nungia parnok tenüng asang.

Bresthostibarnü linük nung nisung tasen 22 dak coronavirus tasenba putet, ta Korea Centers for Disease Control and Prevention ajanga ashi, aser tang linük nung iba tashidak agi mener alir ajak senteper nisung 10,613 lir.



April 16, 2020 nü agiba noksa ka nung Farwaniya Governorate, Kuwait nung aliba mozüki tasen ka angur. Novel coronavirus prokshiba azüoktsü merangba maparen nung shilem ka ama Kuwaiti Ministry of Defense ajanga Bresthostibarnü iba Farwaniya Governorate nung aliba mozüki ya renem. Tang iba mozüki nung COVID-19 agi shiranger anepalutetsü.

US-i China dang COVID-19 indang osang tejangja meshir

Washington, Rongchii/April 16 (Agencies): Coronavirus tashidak wara atema United States-i China tali ajungshir aser iba tashidak ya kong nungi poktet ta jangjatetsü meranger, ta Tir Donald Trump-i ashi.

Secretary of State, Mike Pompeo-ia Beijing dang parnoki kechi meteta aliar aji jangja jangja metetdakang, ta ashir.

Bodhbarnü white House nung osangbener senden nung jembiba mapang, Wuhan nung laboratory ka nungi iba virus temai adok, ta asüba osang idang Trump dang asüngdang. Coronavirus ya mezüng Wuhan nung poktet.

"Kechi tensa tamajung atalok, iba indang onoki kanga junga asadanger," ta pai ashi.

China Tir Xi Jinping den sensaksemba mapang iba indang onük ya jembiba asü, ta

asüngdang dang, "Laboratory atema ni pa den kechi jembiba indang ni mejembiner, ni odang mejembiner, tang ibaji jembitsü tim masü," ta Trump-i langzü.

Alima nung iba tashidak wara yagi nisung 136,000 shi süogo aser US kija nunga nisung 31,000 jungnüa süogo. Iba virus yagi nisung million ana dak tema menepogo aser nisung million tesadang ka taneptsü nguogo.

Trump-i osangbener senden nung jembiba sülen Pompeo-i Fox News Channel dang ashiba agi, "Virus ya Wuhan, China nungi adok ta asenoki meteta lir aser Institute of Virology ya shishilempaba tesem nungi mile ishika dang pilar lir, kong iba tashidak mezüng putet."

"China sorkari tepang lapoka iba virus prokshiba indang tejangja ashitsü nungdaker. China sorkar aibelena

malitsüla," ta pai ashi.

Iba virus ya sorkari yariba Wuhan Institute of Virology indang laboratory ka nung yanglutet mesüra February ita iba tesem nungi prokshi, ta osangtem ajanga ashiba parnoki magizüker.

World Health Organization-ia coronavirus lab nung bushitetba kuli mali ta shiogo, ta China foreign ministry ajanga ashi.

"Coronavirus tasenba ya laboratory nung yangluba kuli mali, ta WHO ketdangsertemi aiben shiogo," ta ministry odongtar Zhao Lijian-i Beijing nung osangbener dang ashi.

Nisung nungi nisung dak menatepa aoba virus indang China nung ketdangsertemi tekeratiba nung memetdaksüba asoshi Associated Press news agency osang ka ajanga aitsüba sülen Trump aser Pompeo

nati ola adok.

United States den kasa China-ia virus jangjateta azüokteter ta sayutsü mechi inyakba mapang iba virus ya Wuhan laboratory nungi adok, ta Fox News ajanga Bodhbarnü sangdong.

Parnoki ashiba agi, Wuhan nung virology tendangba lab aser yangji safety standard maliba ajanga nisung kar dak menar oa anasa aliba "wet" market nung poktet, ta iba osang aser tangartemi ashir.

US nunga nisung 30,000 shi sür aliba mapang China ketdangsertemi par linük nung iba virus agi nisung 3,000 shi asüba indang osang sangdongba ajanga Trump aser America ketdangsertem temulung malemba lir.

United States nung iba tashidak agi mener timba lir,

kechiaser asenoki timba sangdonger, ta US tiri Bodhbarnü ashi.

"China ta ajaba linük tulu nung asürtem aji dang asütsü ta naia shidakba nung amanger na?" ta pai ashi.

Scientist temi tang tashi iba virus poktetba indang jangjatsü meranger, aser aikati COVID-19 ya lah (bat) dak nungi adoka nisung dak menaloka ao, ta amanger.

Coronavirus ya pasasa adokba aser China nung aliba laboratory nungi adokba masü, ta US itdangiter temi sayur, saka kata nunga tejangja mali, ta Joint Chiefs of Staff mendenpuba, General Mark Milley-i Mongulbarnü ashi.

US nung iba wara tali tesashiba akümaba ajanga danger tenüng asentsü merangba ka dang lir, ta Trump anemertemi ashir.

UNGMA IMLANG KOSASANGER PUTU MENDEN ACKNOWLEDGEMENT

With the Covid-19 becoming a threat globally and affecting countless people around, here's a philanthropist and a son of 26 Aonglenden Constituency,

Shri. Toshipokba, Ex- MLA & Vice president NDPP Nagaland stepping up and providing essential commodities; Rice & Dal to 700 families of Ungma Village "B" Khel, where his heart always resides. A self-made man who struggle to climb up the ladder, stands with his people today. To those who don't know him, from an early age he has been an active social and political worker and later because of his love for the people in the constituency, he entered into politics. During his brief tenure of 18 months as a elected member of the Assembly in 2011 he has done tremendous work and he never took for granted the faith and support of his people and so most of his supporters are loyal to him even till date. Anyone who knows him would testify that he has always been the go-to politician when the poor and the marginalized were in trouble and this is evident even to this day though he is not the elected representative from the constituency. His leadership quality of " Be a friend first to the common people and then get yourself involved with their everyday lives" is a statement of his character as a person and a politician. At this sad and difficult times he reiterates " I may not have much today and despite my financial constrain, I want to remember and help those who are in need in my constituency with what I have so as to show my deepest concern to the people dear to me by through this humble gesture."

He also shared his heartfelt appreciation to all the leaders of the state who are earnestly reacting and extending financial and material support to the people at this difficult times. Shri. Toshipokba a man of his words we appreciate and acknowledge his selfless concern for his people by sharing his kind in the form of essential commodities. Indeed his act of kindness during this time has won our hearts. God bless you and your family for the people in the days to come too. He further urges the people to stay at home adhere to social distancing and extend your cooperation to the authorities.

Sd/- Mr. Tamsuzenba Lkr (Aola) Sd/- Mr. Onentiba Jamir (Tatar) Sd/- Mr. Imlikokba Imsong (Tatar)

Mon nung Minister P. Paiwang-i shisatokden senden ka ayongzük

Mon, Rongchii/April 16, 2020 (TYO): Deputy Commissioner, Mon office indang conference hall nung April 15, 2020 nü District Administration, Police, NGOs aser lokti tentet balala den Lockdown indang tanabuba shilem dak sendakba nung olemtepsü asoshi Minister of Transport, Civil Aviation, Railways & Land Resources aser Mon District nung COVID-19 atema Minister-in-charge, P Paiwang Konyak-i shisatokden senden ka ayongzük liasü, ta Mon Deputy Commissioner, Thavaseelan K IAS-i metetdaksü.

April 16, 2020 nü Minister P.Paiwang-isa District hospital semdang aser sen lak 2 tenla agütsü.

Iba senden nung jembiba mapang P.Paiwang-i, Mon District nung COVID-19 anema raratsü asoshi District Administration, Police, NGOs aser lokti tentet balala tsungda tesendaktep tajung alitsü kanga dang nungdak. Iba den külemi state, district aser international arrtsülen junga reprangshima mitba maparen akangshitsü kanga tongtibang lir, ta lepshia metetdaksü.

Kasa senden nung lokti tentet balalai, Sorkar School nung azünger kaketshirtem atema kidang aser online ajanga tesayuba agütsü asoshi School Education Department-i mapatong ka inyaksüla ta tebilemba lemsatop, kong Minister Paiwang-i iba maparen

atalokdaksütsü asoshi tekolakpurtem den jembitsü ta nangzük liasü.

Tanga yimti aser jila tem nung pei pei talidaki moteti alir kaketshirtem atema, tang parnok telidak aliba tesem nung dang amungtsü aser parnok metokmeperibatam angadanga teyari agütsütsü asoshi senden nung lemteta liasü.

Minister Paiwang-isa, iba lockdown ajanga timtema alir tejangja kibongtem metettsü aser parnok nem nungdakba teyari agütsütsüla, ta NGOs aser lokti tentetem ajungshi.

Maneni, doctor temi timtem ajangshiba tem angadangtsü asoshi Paiwang-i parnok den sensaksem balaka agia liasü, ta kasa sangdong ajanga metetdaksü.

Mizoram nung April 22 nungi class 12 tatidang tenzükshitsü

Aizawl, Rongchii/April 16, 2020 (Agencies): Mizoram sorkari April 22, 2020 nü nungi HSSLC atema tatidang tenzükshitsü lemtetogo, ta Bodbar nü State Education Minister Lalchhandama Ralte-ashi.

Ralte-ashi agi, kaketshir 4,700 jungnüa tatidang atemtsü asoshi subject asem anünga aliba mapang ka nung, ajungbena dang India nung maparen ajunga shibangba ajanga tagidak aliba class-12 tatidang anogotem athitsüsa kümadok.

"Tanünga subject asem indang tatidang ya April 22 nungi tenzük April 24, 2020 nü tashi State kübok centre 84 nung lemsar agitsü," ta Ralte-ashi.

Tatidang tenzükshitsü ya khenyongi dang mepaidokteti liasü aser iba dak sendakba nung Hombar nü Cabinet nung olemtep agi aser NGOs den yimtenren telok balala senden nunga jembigo.

Ralte-ashi agi, shisaliok inyakyim nung ongdang sendaktepsütsü aser kaketshirtemi timtem ajurba

pungbadaksütsü nükjidong nung State Sorkari-isa television nung visual class tem lapoktsüogo.

Iba 'home class' ya Hombar nungi tenzük aser class 10 nung azünger kaketshirtem atema Science o Mathematics nung nikongdang 3:00 ako aser 5:00 ako tsungda tashi Doordarshan Kendra Aizawl ajanga tesayuba agütsü.

Pai ashiba agi, Bodbar nikongdang 4:00 ako nungi iba amala 'class' tem local cable television 'LPS' nung lapokja liasü aser kasa ya Brehostibar nikongdang 2:00 meta tanga local cable television 'Zonet' nung lapoktsüogo.

Taruba hopta nungi class 9 nung azünger kaketshirtem atema online tutorial class tem tenzüktsü, ta paisa ashi.

Doordarshan Kendra, Aizawl nung sayuba home class tem ya YouTube nung upload südar, ta Ralte-ashi.

Ralte-isa, pei pei kidang pen aser kaketshirtem television ajanga agiba class nung adentsü aser iba den külemi YouTube nung upload asüba online tesayuba tem reprangtsü

asoshi kaketshirtem ajungshia liasü.

Mizoram nunga coronavirus wara azüoktsü asoshi tekümdangtsü meratem agia, March 17, 2020 nü shisaliok reju ajak shibangtsü asoshi State Sorkari tetuyuba agütsü.

Education Minister, Ralte-isa ashiba agi, State Sorkari Hombar nungi tenzük primary school aser middle school kaketshirtem atema onük balala nung poster (noksa) yangluba tetoktepba ayongzüktsüogo.

Primary school nung azünger kaketshirtem atema onükji 'Lockdown' aser kasa mapang middle school nung azünger kaketshirtem atema 'Prevention from COVID-19' onük lemkütsüogo. Iba tetoktepba ya Hokolbar nü tembangtsü, ta Ralte-ashi.

Iba den külemi primary school tesayurtem atema 'innovative practice in teaching' onük nung video clip tatsütsü tetoktepba agidar. Taruba hopta nungi iba amala tetoktepba tem middle school nung azünger kaketshirtem atema achayanga agitsü, ta Ralte-isa metetdaksü.

TATAR MENDEN CHANGTONGYA KOSASANGER PUTU

(Changtongya Village Council)
P.O- Changtongya- 798613: Mokokchung: Nagaland
Email id: changtongyakosasangputu@gmail.com

Ref.No.....

Date: 15th April 2020

TEMZÜNG SANGDONGER

Changtongya Kosasanger Putu Menden aser Changtongya Yimsen Putu Menden nungi nüburtemi meteta alitsü temzüng ka yamai sangdonger. Tang koba COVID-19 tashitak agi alima ajak len timtemer, iba tashitak ya nisungi abenba tashitak ka lir. Anungji iba nungi nüburtem ajak kümzüka alitsü atema iba temzüng azünger.

Covid-19 tashitak ya tazükoba kati maru tashi 'CHANGTONGYA LUSHI-' bendanglen nungi arutsü memelar. Ano telidakpurtema shinga Changtongya litsü alema maotsü. Kari ora iba tashitak ali tashi meyipa marudaksütsü. Nüburtem kümzüka alitsü asoshi yangluba temzüng ajaki metsüareta benshitsü ayimoktsür.

Yimden ana tenüng nung ;

Sd/- CHUBASOWA Chairman Changtongya Yimsen Village Council Sd/- TIASUNEP Chairman Changtongya Village Council

OFFICE OF THE LUYONG VILLAGE COUNCIL

P.O. TULI- 798618, DIST - MOKOKCHUNG, NAGALAND

PELABA LEMSATEPER

COVID-19 alima tashidak wara nokdangtsü asoshi yimtsüng aser jilatem ajak shibanger nüburtem timtema aliba mapang, Shri.Temjen Imna Along, Minister of Higher & Technical Education and Tribal Affairs, GoN aser Dr. Longri, Advisor, Treasuries & Accounts, National Highways, GoN nati ozü yimtsüng atema Jang, Dal, Alo, M. Oil, Hand sanitizer aser Mask teyari agütsüba atema kanga pelaba metetdaksür.

Tsüngremi lennir ana taküm maneni moajangma.

Sd/- T Shilu Ltr Chairman Luyong Village Council Sd/- M. Zulu Aier Secretary Luyong Village Council

OFFICE OF THE MOLUNGYIMSEN VILLAGE COUNCIL

Kosasanger Putu Menden

P.O. TULI- 798618, DIST - MOKOKCHUNG, NAGALAND

PELABA SANGDONGER

COVID-19 tashitak agi alima ajak makmakshimak tulu agi sünger ayaku tia nung alidang ozü yimkong tonga jang, dal, alo, m.oil, hand sanitizer aser mask osettem agütsü nung Shri Temjen Imna Along, Minister of Higher & Technical Education and Tribal Affairs, GoN aser Dr. Longrinüken, Advisor, Treasuries & Accounts, National Highways, GoN tenadang kanga pelar. Tulusang Tsüngremi lennir ana taküm nung teti azükaru agi len aniangma ta ozü sarasadem.

Sd/- S. Purtongzü Tzüdir Chairman Sd/- Tiameren Jamir Secretary

Wokha DC-i tetuyuba agütsü

Dimapur, Rongchii/April 16 (TYO): Wokha Deputy Commissioner, Orenthung Lotha-i, Disaster management Act 2005 kübok Section 22 (h) aser Epidemic Disease Act 1897 kübok Section 2, 3 aser 4

nung tashi agüja aliba dak ajemdaker Department ajak dang district nung COVID-19 tashidak prokshia meyoxtsü asoshi May 3, 2020 nü tashi maneni district mokdanga ayutsü metetdaksüogo.

Peren DC-i metetdaksür

Dimapur, Rongchii/April 16 (TYO): COVID-19 tashidak nokdangtsü meranga inyaktepba mapang nüburtem ajangzüktsü asoshi Peren Deputy Commissioner, Sentiwapang Aier-i, tetuyuba kar agütsüogo.

1. Temelaba agütsür aliba ketdangsertem aser tenüngdakba service agütsüba department tem dak alaker district ka nungi district kati aoba aser district telung nung nungdaka makai senzisenpongba nokdangtsü.
2. Mapang ajak nung lokti nung inyaksangshiba mapang tetsungda iter inyaksangshitsü
3. Dimapur nung tashidak alir ka putetba sülen lokti nung iba tashidak menatepa meyoxtsü asoshi check point ajak nung screening kanga junga agitsü aser kanga kümdanga meita atatsüla

4. Dimapur nung Marwari patti, Ghorapatti aser Zion Hospital semdang alitem aser nisungba den ajurteper lira control room nem osang agütsütsüla aser peisasa anogo 14 bosa quarantine asütsü asoshi subdivisions ajak nung nüburtem aser level functionaries ajak nem tetuyuba agütsütsüla. Iba inyakyim ya temalen shisema aliba nüburtem den ajurteper alirtem ajak asoshi asütsü
5. Tetuyuba sülen manidakertem ozüng anemertem ama agitsü aser Epidemic Disease Act 1897 kübok merenshitsü
6. Medical Department kübok District surveillance unit-i kidang quarantine asürtem mesera asadanga yua alirtem indang symptoms tem asadanga alitsüla.

Weightlifting Chief Tamas Ajan mapang nungi anen



Budapest, Rongchii/April 16 (Agencies): International Weightlifting Federation (IWF) tir Tamas Ajan Bodhbarnü mapa nungi anenogo. Taküm küm tetenzüklen documentary ka yangluba nung ochi mashi inyakyim aser doping dak sendakba nung inyakyim mishidak benshiba indang tuteta sayur aliba mapa ka nung pa mapa nungi anenogo.

"Küm 40 dak tema weightlifting asaya atema inyaksüba asoshi Tamas Ajan nem IWF-i tenüngsang agütsür," ta IWF acting president Ursula Papandrea-i ashi.

"Onok asaya temaba jenjang tonga anitsü asoshi lenmang tasen ka mesapoktsü atema onoki mapa inyak tenzüktettsü," ta Papandrea-i ashi.

Budapest nung amendaker aliba federation sangdong ajanga ashiba agi, German broadcaster ARD puri January ita report ka ajanga tai tuteta sayuba bushitsüngdang tesüdak lir.

Iba documentary nung asaya

nung ochi mashi inyakyim ka yimya ama benshia aruba sayuogo, kong nüngtugu weightlifter tem drugs test kanga ajema agir aser urine samples tem indang osang melenshitsuüsü asoshi doping controllers temi sübokrem agiba indang shia lir.

Arishi küm 81 tain Hungary nung Ajan ya 1976 küm nungi IWF nung inyaka aru. Pa küm pezü general secretary ama inyak aser taoba küm 20 tir ama inyakogo. Pai iba taitüsü ya shidak masü ta shiogo.

Journalists ARD indang sentong nung Hajo Seppelt dena lir shibai Russia state doping scandal indang otsü temai adokdaksü. Iba sülen 2008 nungi 2017 tsüngda world championship aser Olympic nung medal ngur alir parnok 450 rongnungi tesadangka doping tests agitsü tuyu. Kasa mapang nung Moldovan team doctor kati urine samples indang osang koda tai agütsüsü iba indang rasaa ashiba mim camera ka ajanga tangoka liasü.

Doping dak alia iba report nungsa International Olympic Committee-i agütsüba USD million 5, Ajan kijai achaayanga Swiss accounts anati yokba atema IWF aitsüogo.

Ajan-i ashiba agi, ARD-i pa tim mesüi aitsüoigo.

"Iba film ajanga kü taküm aser ni küm 50 tashi inyaka aruba ajak raksatsüogo. Ni inyakba mapatem rongnung shilem tuluba kabo doping nokdangtsü asoshi liasü," ta pai ashi.

Papandrea-ia, Bodhbarnü anti-doping programme dak sendakba nung Ajan-i mapa tajung inyakba atema pa nem tenüngsang agütsüogo.

"Ni iba asaya asoshi kü taküm bendanga agütsüogo," ta Ajan-i ashi

"COVID-19 wara süshir election agiba ajanga putu tasenba nung lenirtem nem asenoki meimba asaya temaba jenjangi ajungkettsü asoshi parnok mapa tenzüktettsü atema lenmang lapoktsütsü," ta paisa ashi.

Rohit coaching academy ka indang brand ambassador kümogo



Rongchii/April 16, 2020 (Agencies): India limited-overs team vice-captain Rohit Sharma, 'CricKingdom' indang brand ambassador kümogo. Iba academy ya Dubai nung amendaker lir aser coronavirus tashidak süshiba sülen iba academy yagi online ajanga coaching agütsüsü.

CricKingdom's online platform ajanga student, coach aser academy balala

sendaktepdaksütsü.

Iba ajangsa coach tem, ground/nets aser academy balala achaayangtsü asoshi mekazüka ayutsü atema teyari agütsüsü.

"Asaya nung mapang balala nung tendanga aruba inyakyim koba ajanga nüngtugu asayartem aika adokdaksüogo, iba inyakyim den modern scientific training methodologies tem longjemdaksütsü asoshi

CricKingdom-i meranger," ta Rohit-i ashi.

"Parnok nükjidong ya mapang tatsüka dang asoshi masü aser lenla ajak kanga junga asameyanger inyaksü aser professional kümdaksütsü meranger," ta Rohit-i ashi, shiba Director ka kümdaksütsü asoshi benoka lir.

Iba academy nung Mumbai medium pacer Dhawal Kulkarni-a mentor rongnung ka ama densema lir.

Iba sentong nung coach 20 shi densema lir, aser parnok rongnung timbaka grassroots aser junior level nung inyakdang alirtem lir. Coach tem rongnung Pradeep Ingale, Parag Madkaikar, Subhash Ranjane aser Prathamesh Salunkhe nung densema lir.

Coaching ya küm 5 nungi 8, küm 8 nungi 13, küm 13 nungi tema aser club o temaba jenjang nung cricket asayartem, ta jenjang pezü küma lemsar agütsüsü.

SAI indang Online Workshop tenzüko

New Delhi, Rongchii/April 16 (Agencies): National Sports Federations (NSFs) den longjemer coach tem asoshi Sports Authority of India (SAI)-i Brehostibarnü anogo 21 atema online workshop ayongzükba mezüngbuba session nung Union Sports Minister Kiren Rijju-a denogo.

Dhronacharya Awardee Sanjeeva Singh-i mezüngbuba session agi kong Rijju, Union Minister aser Archery Association of India tir Arjun Munda dena liasü.

"Coach tem atema anogo 21 online workshop tanü tenzüko. Mezüngbuba session, archery; Dhronacharya Awardee Sanjeeva Singh-i agi aser Kiren Rijju o Arjun Munda dena liasü. Coach tem nem

shisatsü agütsüsü asoshi SAI aser NSFs nati tang mezüngbuba iba online sentong ayongzükba agidar," ta Rijju indang office ajanga tweet asü.

Union Tribal Affairs Minister, Munda-ia, "Coach tem atema anogo 21 online workshop tenzüko. Mezüngbuba session, archery; Dhronacharya Awardee Sanjeeva Singh-i agi aser Kiren Rijju küna dena liasü. Tang mezüngbuba SAI aser NSF-i iba online sentong ayongzükba agir," ta tweet asü.

Linük ajunga nungi asaya 16 nung coach tem iba workshop nung shilem agidar, koba coronavirus tashidak pokteter aliba ajanga linük ajunga mokdang aliba mapang ka nung achaayanga agidar.

Praveen Teotia-i pa indang medal auction asü



Rongchii/April 16, 2020 (Agencies): 2008 Mumbai terror attacks mapa yiruba marine commando kati pa indang marathon medal tem yoka, COVID-19 tashidak den raratsü asoshi sen bendentsüogo aser pai sen lakh 2 bo tenla agüjatokogo.

2008 küm Mumbai Taj Hotel nung 'Operation Black Tornado' nung Indian Navy MARCOS marine commando tem rongnung Praveen Teotia densema liasü. Shaurya Chakra ngur alisang dak injang pezü agi teku nung akha aser pa teku tachichilen kanga mejungi yiruba den pa tenarong tabelen len raksa.

Tangbo Teotia ya marathon asemer ka kümogo, shiba alima ajunga nung asayamung balala nung shilem agia senzür aser pai COVID-19 tashidak den raratsü asoshi pa indang medal auction süa teyari agütsüsü telemteba agi.

"Ato Kilonser Narendra Modi-i sen bendentsü asoshi ayongzükba sülen ni kü indang medal 40 online platform nung auction asütsü telemteba agi. Ni medal anabo yoktetogo aser sen lakh 2 aazükogo. Iba sen ya PM-CARES relief fund nem agütsüogo," ta Teotia-i Indian express dang ashi.

"Item medal tem ya 26/11 nü injang agi yiruba sülen ni meranga asayaa aazükba

medal tem lir. Anungji ni iba tenla agütsüba ajanga tangaria pei akokba yari tenla agütsüsü atema jungmesotsü inlar," ta pai ashi.

"Iba rara nung asenok ajak dena lir ta amanger. Asenoki kati ka maitsütepi kati ka nongita yaritepti," ta paisa ashi.

Pai meranga inyaker aadenba medal tem auction asütsü asoshi kechi agi ajungmeso ta asüngdangba mapang Teotia-i, "taoba mapang sepai ka ama linük nem meyipa agütsüsü asoshi kü dang teti sayuogo. Ni linük asoshi taküm bendanga agütsür 39 aser nüjiso asoshi rarar ti aser taoba mapang PM Chaudhury Charan Singh nung adokba yimtsüng nungi lir. Ni doctor-a masü mesera medic-a masü anungji iba amala timtem mapa linük asoshi ni inyaktetsüba ajak agi iba ya dang lir," ta pai ashi.

Teotia ya tang par kibong den Uttar Pradesh kübok Bhatona yimtsüng nung alir.

2008 küm yiruba sülen surgery pongu agir pa mozükidang nungi yok saka pa tenarong agi junga mangashi liasü. Taoba mapa nung tanaben minyaktetsüsa akümba sülen pa office nung inyaksü lemsütsü.

Indian Navy nungi tuguba sülen pai inyakteta sayutsü mulungteter Teotia, marathon nung shilem agi tenzü. Küm terana sülen pa marathon 24 shi nung shilem agiogo. Pai alima nung highest ultra marathon; Ladakh 'Khardung La Challenge' nung shilem agiogo. Pa aneben tashi Ironman naroküm nguogo (South Africa and Malaysia) aser 2020 küm pa India nung rongnungi mezüngbuba differently-abled Ironman ama Limca Book Records-ia iogo.

BILEM DANGANG

"Rongsen aser tashi agi akhümtsübu majangzükettsü"